

ta Africa, quanquam persæpe, autore Plinio & Pomponio, circumnavigata: hodie autem regum Portugallia curra iterum patefacta est: & quo Romanorum arma olim penetrare non potuerunt, illic hodie Hispanorum peruenit uictoria. Omnes supra nominati Aethiopes in eam partem uergentes, sub æquinoctiali & circa initia tropicorum habitant, autore Ptolemæo, magno errore eorum qui sub torrida zona mortales habitare negant, id quod hodie adeo compertum est, ut demonstratione non egeat. Summus Aethiopiae rex dicitur esse Pretoianes, quem illi Hiam, id est, potentem uocant & est tam potens ut 62. alijs regibus imperitare prædicetur. Christianus est, & iuxta Nilum habitare dicitur.

Asia maior.

Asia altera tripartite terre pars, in plures diuidit portiones, quarum alie maiores, alie minores comprehendunt ambitus. Tam latum autem & patens dicitur esse, quicquid terræ Asiæ nomine continetur, ut Africa & Europa non magis complectantur quam sola Asia. Cælo temperato est, solo fertili, & propterea omnium animantium genere cultissima. Quapropter liquet, in ea uarios gentium esse mores & ritus, uariaque nascentium mirabilia.

Asia minor.

Habet hæc regio, sicut & circumiacentes, nempe Pontus, Bithynia, Lycia, Pamphylia, Cilicia, Rhodus, &c. multas insignes urbes. In Asia minori est Ephesus, & Ilium seu Troia. Metropolis Bithyniæ est Nicæa. Rhodiorum urbs super orientali promontorio sita, portibus, uis & mœnibus, & cætera fabrica tantum alias excellit, ut nulla ei æqualis facile inueniatur. Multo tempore dominata est mari & piratas sustulit. Romanis amica fuit et Græcis. Ibi fuit Iouis colossus, qui dicitur fuisse 70. cubitorum, sed postea ex terra motu fractus, genibus collapsus est. Habet Rhodus insula in circuitu ambitum 920. stadiorum, Ciliciæ regio abundat

cedris & alijs arboribus idoneis pro fabricandis nauibus. Fuit quoque philosophiæ studiū tam magnum in Tharso urbe, ut superarit Atheniense & Alexandrinū, licet solum indigenæ & non multi peregrini illuc aduenerint. Pontus, unde Strabo oriundus fuit, habet planiciem semper roscidam & herbida. Tantam præterea agrestium pomorum & ultro nascentium copiam regio affert, uuarum, prunorum, malorum, ac nucum, ut quocūque anni tempore in syluas exierint, ijs abundant, cum interdum adhuc fructus in arboribus pendeant, interdum lapsa in terram sub folijs iaceant. Vnde & multa est ferarum omnis generis in ea regione uenatio, propter alimonie copiam. Cyprus insula abundat uino, saccharo, sale & oleo, frumenti quoque satis habet: æris metalla apud Tenassum abundant, in quibus uitreolum et rubigo æris nascitur, ad medicinæ usum idonea. Regia sedes fuit in Nicosia, à qua octo Germanicis miliaribus distat Famaguschæ alia insignis urbs. Veneti hodie dominio eius potiuntur. Nam cum Iacobus regis Cypri illegitimus filius pro firmitate regni seruandi duxisset uxorem filiam cuiusdam ciuis Veneti, quam senatus in filiam adoptauerat, morereturque post eius impregnationem, commendauit uxorem & filium Posthumum Veneto senatui. Et cum Posthumus haud multo post moreretur, regnū peruenit ad manus Venetorum, quod tamen debebatur Ludouico Subaudiensi, cuius uxor erat legitima filia regis Cyprii. Contigerunt autem ista anno Christi 1473. Cyclades insula numero sunt quinquaginta tres, sic dicte, quod in modum cycli circum Delon insulam positæ sunt, inter quas una est que Posidium & alio nomine Pathmos uocatur, in qua Iohannes euangelista in exiliū missus est. Est & alia insignis que Lesbos uocatur, in qua est Mitilene ciuitas. In Lycia mōs est Chymera, qui nocturnis æstibus fumū exhalat, sicut Aetna in Sicilia. Ga-